

M109: Himmel und Hölle

153,1 diu himelische gotes burc diu ne bedarf des sunnen noch des mânschîmen
153,2 dâ ze liuhtenne . in ire ist der gotes schîme der sie al durhliuhtet
153,3 in gemeineme nutze . daz ist
153,4 in ebene allen . al daz sie wellen . dâ ist daz gotes zorfel . der unentige tac
. der bürge . tiure liehtvaz . diu burc
153,5 ist gestiftet mit aller tiurede meiste edeler geistgimmen . der
himelmergriezen .
153,6 der bürge fundamenta . die portae joch die mûre . daz sint
153,7 die tiuren steine der gotes vürsthelede . unte daz eingehellest aller heiligene
153,8 hêre . die dâr tugentlîche in heiligeme lebenne deme burckünige
153,9 ze vürsten gezâmen . siu stât in quâderwerke . daz ist ire êwic
153,10 stift . unde sint ouch dâr ane errecket alle gotes trûtvriunde . die dâr
153,11 hânt ervüllet die vier evangelia in stâter tugent regula . in gelîcheme
153,12 einmuote . siu ist in ire strâzen daz rôt loheze golt . daz meinete
153,13 daz dâ vürsteset diu tiure minne überal . der gotelîche wîstuom . mit
153,14 alleme wolwille . siu ist in golde schoene . same daz durchlichte glas .
153,15 alliu durchschouwic joch durchlûter . dâ wîzen al einanderen
unvertougenlîche
153,16 die himelischen erben . die die burc bûwent in durchschoenen tugenden .
153,17 âne aller missetâte pflege . dâ rîcheset . diu minne mit aller
153,18 miltvröuwede . und aller tugendene zale mit stâten vrastmunte . dâ
versellet
153,19 diu wârheit daz alte gedinge . dâ nimet diu geloube ende aller ire
153,20 geheize . dâ ne habet reste der engele vrôsanc daz süeze gotes
153,21 wûnnelop . diu geistlîche mende . der wundertiure pîmentstanc aller
153,22 gotes wolen . dâ ist daz ziereste here allez in einhel . daz dienst
153,23 êwent sie mit senfteme vlîze . dâ ist des vrides stâte aller genâdene
153,24 bû . dâ ist offen vernunst aller dinge . al gotes tougen . daz ist in
153,25 allez offen . sie können alle liste in selber wârheite . der ne habent
153,26 sie âgez . der hûge in ne wenket . in ist ein alterbe . eines rîches ebenteil .
153,27 dâ ist alles guotes übergenuht mit sicherme habenne . der durnehteste
153,28 trôst . diu meiste sicêre . dâ ne ist vorhtene nicht nehein
153,29 missehebede . dâ ist einmuote . aller mammende meist . der stilleste
153,30 lust . diu sichere râwe . dâ ist der gotes vriunde sunder gebiue dâ
153,31 ne ist sündene stat . sorgene wizzede . dâ ne ist ungesundes nicht heile
153,32 meist ist dâr . der untriuwen âkust ne taret dâr nicht . dâ ist diu
153,33 veste wineschaft . aller sæledene meist diu milteste trûtschaft die
153,34 küninlîchen êre daz unerrachlîche lôn daz gotes ebenerbe . sîn wünnlich

- 153,35 mitewist diu lustsameste anesiht . unte der sîner minnene gebe tiureste .
- 154,36 daz ist daz hêreste guot daz dâr vore gegerwet ist gotes
154,37 trûtvriunden mit ime ze niezenne iemer in êwe . sô ist daz himelrîche
154,38 eines teiles getân .
154,39 in dere helle dâ ist tôt âne tôte . karôt unde jâmer . al unvrôuwede
154,40 mandunge breste . beches gerouche der sterkeste swebelstanc .
verwâzenlich
154,41 genibele . des tôdes schategruobe alles trüebesales . wâge .
154,42 der verswelhente . louc die wallenten stredeme viurîner dunste
154,43 egelich . vinsten . diu iemer êwente brunst . diu vreissamen tôtbant .
154,44 diu bedwungeneste pfragene . klagewuoft âne trôst . wê âne wolen .
154,45 wîze . âne reste . aller wênicheite nôt . diu herteste râche . der hantigeste
154,46 ursuoch . daz sêrige ellenttuom . aller bittere meist . quâle âne
154,47 vrist . ungenâdene vlîz . üppige riuwe . karelich . gedoeze . weinleiches
154,48 achezôt alles unlustes zâlsam gestürme . vorhtene . bibe . zane klaffunge .
154,49 aller wêschreie meist . diu iemer werente angest . aller schande gelîch .
154,50 daz schamelîcheste offenen aller tougenheite . leides unende . und
154,51 aller wêwe gelîch . marter unerrachlich . mit allem unheile . diu wêwiclîche
154,52 harmschare . verdamnunge swereden âne al erbarmede . itniuwiu
154,53 sêr âne guot . gedinge unverwandellich übel . alles guotes âteil . diu
154,54 grimmigeste hêreschaft . diu vîantlîche sigenunft . griuwelich gesemene .
154,55 der vûlede unsûbericheit mit allem unschoene diu tiuvelliclîche anesiht .
154,56 aller egeselîch . alles balwes unmez . diu leitlîche heime . der helle karkære
.
154,57 daz rîcheste trisehûs alles unwünnes . der hitze apgründe . umbegebillich
154,58 verlor . der tiuvele tobeheit . daz ursinniclîche zorn . und aller
154,59 übelwille der ist dâ verlâzen in aller âhtunge vlîz . und in alle tarehafte
154,60 der helle erben âne eites ende iemer in êwe . sô ist daz hellerîche
154,61 eines teiles getân